



Pastor's Meet 12-01-2023, Thangkai & Lungpau Hall



HÂTTAK LEH HÂNG TAK IN UM IN

- National Education Policy (NEP-2020)
- Khanglaite Leh Sakhua
- Phâkna Tiang Ah Kipat Masawn

To:

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Chinglalven, Secretary, CKNP
: Upa Genminlun, Secretary, CKKP

Business Manager : Pu Lalbiaklian, A/S Office.
MPCS Office D. Phailian
P.O. Box 107 CCPur-795128 Manipur
Phone No. +91 9089623251
Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. HÂTTAK LEH HANGTAK IN	04
4. SUNDAY SIKUL NGAI PAWIMAW	06
5. NATIONAL EDUCATION POLICY (NEP-2020)	09
6. KHANGLAITE LEH SAKHUA	15
7. SERMON	
a) Kithawina Hing	18
b) Phâkna tiang ah kipat masawn	22
8. KIVENG ZING IN UM IN	26
9. LA LEH A CHANCHIN	27
10. KKP HUANG	31
11. KNP HUANG	34
12. SUNNA	35

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Bial enkawl Pastor-te leh a zi leh chateu â ding in pauchap hitiu. Chuleh Evangelist leh Pro. Pastor-te â ding inle pauchap hitiu.
2. Kochuam tin Naupang Sunday School zilsaktute â ding in; i cha leh nauteu Pathian thu diktak ah a zilsak theina ding un leh Piting zilsaktute â ding inle pauchap hitiu.
3. KNP Kikhawmpilan leh KKP Vaihawm Kikhawp zintuntu ding Kangvai Bial leh Phailianbung Bial te a ding in pauchap hitiu. Chuleh Program lawting tak ah mat a hi theina ding in dawn hitiu.

KHAWSAK KAWLPHE

Kum 2000 masang lai a khan nausen Jesu be ding in khawsak miching te a hung ui. Kum 1991 a khan khawsak lama China gam in numei pakhat *Yang Xiangbin, Lightning Deng* le kiti chu Jesu hung piangkít a hi a tiu. A mapuitu pau chu *Zhao Weishan* hiin, a Jesu hi tawh nupan gualin a kithua ui. A kochuam mudawk uh chu *“The Church of Almighty God”* a tiu a, a bible uh chu *“The Word Appears in the Flesh”* ti a hi. Zia zilsakna hi eimau lak ah genlat beksetlo ah a um lai in Nagaland Baptist Kochuam a la suling ta, Mizoram ah le thawm a hung gi kit hi. Manipur a hin unau Kuki lak ah semtu bang hem zat nei uh hi ah hiat a hi bawk hi. Chun, Shillong hi education centre a hi ziak in zia thugin kithezakna mun pawimaw takah hiat a hi bawk hi. A tangpi in internet mang in na a sem ui ti a hi. A thu zilsak nau ah hiat ding ah pawimaw bik te vak gen hi tiu:

1. *“Sualam ah kaw! a hung phêt ah tumlam chan ah a kilat gual hin, Mibing Chapa hung kit ni chule zia gual chu hi ding abi”* (Matt 24:27). Zia bung pumpi hin bang gen nuam a hem ti lam enloin, zia chang laitak hi a lau ah Jesu hungkit takleh khawsak lam a pat tumlam zuan ah kawlphe gual ah hung vak ding a hia, China hi khawsak lam ahia, tu ah Lightning Deng hi Jesu chu a hi tai a tiu a hi.
2. *“Lalpa, Lalpa ei ti taphot van-gam lut ding a hi ziang puau”* (Mat 7:21) ti thu hi mang in Kristian te haw hi van-gam lutlo ding ngen a hiu a, ei uh chu Jesu hi numei ah hung piang ahi ziak in Lalpa tilo ding, van-gam lut bik ding in a kingai uh a hi.

Zia gual zilsakna hi i gam sung in a la um ta, internet mang ah phone ah campaign ahi kit bawk ui. Kumlui ah i thupiu Nun fimkhur kha a pawimaw hi. Insung tin leh Kochuam tin in panlak a hun hi.



Ko chuam Huang

1. Vaiphei Christian Association (VCA) vâisaina in January 12, 2023 (Ningani) ah khan a khatveina ding in Vaiphei Pastor-te kimukhawmna **“One Day Pastors & Executive Committee Members’ Fellowship”** kiti chu Thangkai-Lungpau Hall, Tangphai Synod Office ah lawting tak in nei a hi. Zia hun ahin Denomination chuam chuam ah kipat in Vaiphei pau mang Pastor 43 hial a chiakhawm thei ua, Mizoram Synod apat Pastor 3 leh Consultant inle zia hun hi a uap thei u’i.

2. January 11-12, 2023 sung ah khan Rev. S. Lama

Vaiphei, Executive Secretary chu Silchar ah PCI Executive Committee in a va pang ah, January 15, 2023 ah khan Guwahati ah Pastor Induction a hung neipi ngal hi. Dam leh navak tak ah hung tung kit in, Office 16/1/23 ah kipat khan a kâi kit thei tai.

3. Mizoram Synod in Pro. Pastor kila thakte leh Pastor umsate Transfer & Posting a hung guanggal dungzui in, January 15, 2023 (Pathianni) ah khan a nuai ah gual hin Pastor Induction leh Pro. Pastor kawidetna hun mat a hi. Buaina umlo hial ah ziagual ah Khawmpi Lian in Programme a guanggalate a chiathâk thei ziak ahin Kochuamte’n Pathian kiang in kipak thu gen hitiu.

4. Bial	Pastor/Pro. Pastor	Induction puitu/Kawidettu
Guwahati	Pastor Mangminthang	Rev. S. Lama Vaiphei
Dumlian	Pastor H. Lamthianmuan	Pastor C. Lalrinliana
Phailianbung	Pastor T. Lalgin	Pastor Thanglianlal
D. Phailian	P/P Minthianboi	Pastor Lalremliana Colney
Lamka	P/P Lunmuanthang	Pastor Vanlalchhuang
New Lamka	P/P Lalgoulian	Pastor Nicky Lalremmawia

HINNA VÂK

5. Synod Calendar dungzui in January 20-22, 2023 sung ah khan Bial tin KKP-ten Bial Conference a mang thei chiat ua, kipak a um ma ma hi.
6. February 10-12, 2023 sung hi Bial KNP Kikhawmpi hun hi ding a hi ta, Numei Pawlten Pathian mapuina leh pawlna chang ah Kikhawmpi nuam leh navak tak ah a mat chiat theina ding un Kochuamten pauchapna'n delzui chiat hitiu.
7. Rev. Siamlalron leh Pastor Andrew LR Khiangte –te chu PCI malakna ah **Peace and Justice** Seminar in a va pang thei u'i. Zia Seminar hi Mawroh Presbyterian Church, Shillong ah February 1, 2023 ah khan nei a hi.
8. Rev. Siamlalron chu kum 2022 Mizoram Synod Kikhawmpi in Aizawl Theological College ah M.Th. zil ding ah a phalpiak dungzui in tu kum sung ah ATC ah lut ding a hi ta, zia hun masang chu Tangphai Provisional Synod Office ah a pawimaw bang sêm ding ah kawi a hi dungzui in, January 16, 2023 ah kipat khan Office a kâi pan ta'i.
9. January 12, 2023 ah khan Tangphai Provisional Synod Office ah, Tangphai Presbyterian Kochuam Revival Speaker-te sia **Revival Speakers' Orientation** neipi a hiu. Zia hun pawimaw tak ahin Rev. PB Zosaphara, Rev. Kamkhotinthang Neihshial, Rev. Ngurthanmawia Sailo leh Rev. C. Lalrinliana te ah kipat in thupi chuam chuam mang in hun a mangkhawm u'i. Revival Speaker-te leh team member khenkhatte zia hun ahin a pang thei u'i.
10. Tu kum, kum 2023 sung â ding ah ah Tangphai Presbyterian Kochuam Revival Speaker-te leh a teamte'u:
Pu VK Thanga Bethzatha Revival Team
Pu Kamzathang Bethel Revival Team
Tv. ST Satboi Hermon Revival Team
Tv. M Sasang Jeriko Revival Team
Chun, Tv. Lianthangpui, Hill-town Kochuam hi a pawimawna mun ah Revival Speaker ah mat thei ding in Revival Committee chun thupûkna a siam hi.

“HATTAK LEH HANGTAK IN UM IN”

(Joshua 1:7,9,18)

Rev. Luttinlel

Joshua lekhabu bung khatna sung ahin, zia thu pawimaw tak hi velthum a gen hi. Israelte'n Kanaan gam a lakna dingua hin melma tamtak do ding a nei ziakun, lungthuailo ah galdo ding leh gam a lak nung ua a lua ding dan uh genna thupiak leh tilkhona thu a hi. Amau hih a tak ah galdo a hiu a, ei uh Khristiante â ding ah chun Setan gallian do ah hattak leh hangsan tak ah melmate do ding ah panlakna ding leh i kipakman mu ding tiang ei kawkmuna a hi. Gamthim lam ah i nasepnau a hin i chawtnau taphawt chu i gam uh hiding a hi dan ei kawkmua a hi.

HATTAK AH UM : Mihing sual ah a pûknung in Setan dawidan ah thuzaw ah um in, kinak, kinial, kithana leh kidonate hi a hung umta a hi. (Kaina'n a suapi Abel a that ta a hi). Israelte khangthu i et ahi chun kidona'n hun tamzaw a mang ui. Ziakiachun, kidona ding ah pawimaw ma ma chu “THA HATNA” hi a hi. Lalpa'n Joshua kiang in zia tilkhona thu hi a la gen a hi. Khatvei bep hilo in velthum zet ala gen hi. Malai ah kipat tutiang in sepai ah pang dingte chu hawitak in etchetna a nei sek uh a hi. Taksa titna (physical fitness), damtheina (medical), mi pangai (mentally fit) a hi ding a hi. Zia khêl ah chun nek leh dawn ah kisumthei mi leh, a dang dang um in a. Ziagual

mite chu, training pia in, a thiam taku leh galdo ding ah sawl a hi seku'i. Melma hattakte do ding leh zo ding ah chun, amau sâng ah hatzawk, thiamzawk ngei a pawimaw ziak in Lalpa'n Joshua kiangin zia thu hih a la gen a hi.

HANGSAN TAK AH UM : Thahat bep hilo ah hansanna hih a pawimaw zia kin, Lalpa'n hattak leh hangsan takin um in a ti a hi. Thumal panite hih kenchuam theilo khawp ah pawimaw chu a hi. Mithahat tamtakte hih a hansanlo ziak un galdona in zawna a chang theilo uh a hi. Gâlkuan zosia chu mi hangsan a hi suak diakpauu hi.

JESU TAWH KITHUA HANSANNA (Nasepte 4:13): Peter leh Johan

HINNA VÂK

hansandan a mu' u in, amau la lekha helo ahiu ti a het phat un lamdang a sa ma mau a; Jesu tawh kithua sek a hi ngei ui ti a he tau a.

SEPAI HANGSAN 300-TE (Vaihawmte 7: 3-ff): Lal Gideon in a melma Mediante do ding ah a kuan lai khan a sepia singni-leh-sangthumte(23,000) kha inlam in a kilekit ua, sepia hangsan zathum bep tawh gal a do ua, a zo uh a hi kha.

Kidona him him ahin mi hangsan, a gam â ding ah a hinna pengamte zâl in zawna a um sek a hi.

MI DAWILAWK (Kisimna Lekhabu 13:1-ff) : Kanaan gam enthatu mi dawilawk sawm (10) te khan huphul leh lungthuai tak in report a piau a hi. Mi pani bep hangsan a um gual ah hin ei uh lak inle mi dawilawk i tamzaw sek uh a hi. Himaleh, mi hangsante zâl in, zawna a um sek hi.

THUKHAKNA : KLB.No. 366na hin khakna siam hitiu.

Chang khatna : *“Kama luigâl khawpi hawi chu a um”*.

Israelte'n Kanaan gam a thangai ngawi ngawi ua, a vak gâlthîl gualu'n, ei unle Van Jerusalem chu ngai in i thîl seku'i. Gam enthatute chun hattak leh hangsan tak ah galdo ding in a

kipiau ah zawna a chang ngei uh a hi kha.

Chang thumna : *“Ba lo in chia zing hitiu've”* - Bâlo ti hin chaulo, thahat zing in tina a hi. Dodalna tamtak um maleh melmate chu lian in tam maleu, lungthuai puaitiu.

“Lei hin gal muanna a um puai”: Kaina leh Abel ah kipat kido nam, kitha chîngte i hitau ah, galmuanna a umlo a hi. Malai mite'n kidona hun tamzaw a mat gualu'n, ei uh le Lalpa kiang i tun masiau Setan galdo ding i hui.

Zawna chu Lalpa â a hi ziak in a thupiak zawm ah, gal i do uh a hi chun zo ngei ngei ding ah thupiak leh thutep chu a hi ngal a. Gal lau-um ah um in, gitlona gâl tawh nisin kido i hi ziaku'n Pathian galthuam bukim ah kivan in i um diu a hi zawi. (Ephesa 6:11)

Pathian thupiak chu *“Hattak leh Hângtak in um inla, la chawtna taphawt chu la gam hizel in ah”*, ti a hi ngal a. I gam i lakna tiang tiang chu ei uh gam hi ding a hi ziak in kithalawp a um khawpmai hi. I luana ding uh gam chu chawk ngailo, pucca patta umsa, kumtuang â ding ah khasana piaksa, galvan ah vên ngailo a hi ziak in, Hattak leh Hângtak in um chiat hitiu.

Lalpa'n a thu malsawm ta hen!

SUNDAY (PATHIANNI) SIKUL NGAI PAWIMAW

~ Rev. N. Khanpau
Compound Veng

Thumapui: Kum tamtak hi Pathianni sikul hi ila bawl tau a, Pathian ni sikul zilna ding ahin a pawimaw masapen chu a thiltup hiatchian masak ding a hi.

A thiltupte chu zia a nuai ah te hi a hi :

1. Pathian hiatna leh ginna diktak nei ding ah puihuai leh panpi.
2. Pathian thu (Bible) zilsak.
3. Kristian thugin zilsak.
4. Pathian biak zilsak.
5. Kochuam mi phatak leh khua leh tui pha tak hi ding ah zilsak.
6. Kristian hindan pha leh umdan ding zilsak.

Pathianni sikul hi bangziak a pawimaw?

I lengkêi ua Bible zil ah chia suak thei ding i hilo ziak un, hotute'n Bible zilna nai pen a hun bawl dawu hi kipak a um ma ma ziang hi. Bible zilna nai pen ahi ziak in mi tin thanuam tak leh lunglut tak a pan chiat ah ngaisak a pawimaw ma ma hi. Pathianni sikul ahin Bible pumpi hi ila zil suak tâk uh le a hia, phatchuam na nei leh neilo chu a zilte mawpuak ahia, nang ngai in phatchuamna nei in la kihe em nung sui thak tia leh la lung a awi zo tak tak na em? Kum bangzat a h'em chiata a khan

Pathianni sikul hi hotu pakhat in pulpit apat in a zillai mipite a hil sek a, mipite hiat thei di tei tei in thei tawp sua in a kigin zing bep hilo in a dawisakna a sulang ma ma ziang hi. Ahiziak in zialai hun chu tulai tawh te in mawllai hun ti thei ding hial le himai thei a hi. Tulai gualah kuama lekha thiam leh zilna nei le a tampua, himaleh a hiatna tiang tiang un Upate leh Pastor ten ala hil sek uh a hi.

Pathianni sikul hi ngaikhawh ah, ngaisak ma ma ding a hi. Kochuam kiphudetna leh taksa leh thagau ah hiatna leh pilna masawanna di a hi ziak in, mi gen ka hiat dan in Mizoram ah

HINNA VÂK

chun, Pathianni sikul a zilna'ua ahin thagau lam ah piangthak le a um sek hi a tiu a, ei uh gam a vâng Pathianni sikul i zilnau ah naupang lam leh piting lam in le thagau lam ah piangthak a kigen khak lam vang a kihe puai bang ziak a hi diam? Ngaitua kham tak vang a hi.

Chun Kochuam Synod ah i hung lut ua pat ahin Pathianni sikul i bawl dan uh pawl (group) in i hung kikhen ua. Biakin sung ah "Upa te'n Nauzupi ne a ti gual un" a kingaitha thei ding pen le umlo in a so in i so veng vung ziang ua, i ngai tua chun i zillai thu te hi la a hawi thei ma ma ziang a, a zilte hin i hiat ua i phatchuampina diam uh ti hi ngaitua ngai tak hin a maw!

Pathian ni sikul hotu dingte

Kochuam tin ahin Pathianni Sikul hotu ding hi a pil a thiam zilna nei le um hi tiu in, ahi ziak in a tamzaw hi mi mawl leh zilna neilo ngen ihu. A hi ziak inla theitawp in hotu pang ding te chu kizil pei, ei sang ah thiam zawte dawt leh vethak hi ching leu hin i hil lai uh mipite a dingin le taksa leh thagau lam ah phatchuamna um ngei ina ti ginchak a um hi. Upate thuching in "Thing (tree) umlona

gua le kimang" a ti sek gual ua hin i pannateu hi ngaikhawk in theitawp sua chiat leu hin kuama a thiamsa leh a hesa piang a um diak puau.

Pathianni Sikul ah Zillai te

Pathianni Sikul hi naseplo ni kimang a hi ziak in hiat di leh utna tak tak neilo te le a pang sek uh a hi. Himaleh i hun pha teu hi mawk thasuak gaw puai tiu in i zil sun sun teu hi hiat tei tei leh phatchuampi tei tei ding in pang hitiu. Hotute'n dawisak tak ah a hun hil teu hi lunglut tak in ngaitha'n la, a bu sim theilote'n a ngai thak lam gunchu guai tiu in, a bu simtheite'n le thei tawp sua in, vel bangzat a h'em inlam in sim chiat leu hin phatchuampi ngei chiat hitiu.

Chun hotu ten le i mi hil teu hin a ngaitha na'ua em, a he nadiam uh, a phatchuampi nadiam uh? ti in, i hil dan teu haw hi le nung sui thak kit sek leu hin pha ma ma ding a hi. A hilo leh bang gual in bawl pi leng, a lung uh a lut thei diam, a tha nuam thei diam uh ti in a hiatdaw ua a phatchuampi thei tei teina ding uh ngaituapi leu hin mipite leh Pathian mitmu in kipakna dawng ding i hui.

Ahun sukthâkna mai ah panglo in Joshua'n "Na lopi tak ka nei nusia thei ding ka hi puai", a ti gual in, na lopi tak nei la hi ti kihe zing inla, la kum khat hotu hina hi phatchuampi leh lawkpi thei ngei ngei dingin panla le chin Lalpa'n hun kipakpi ngei ding a hi.

Naupang lam Zillai

Ka lunglutna ma ma chu Naupang lam zillai thute hi ka thatnawpna leh ka ngai pawimawte lak ah khat a hi. Beginner apat Piting tiang ahin i zillaite'u hi pha tak in hechiat in zui gaw chiat leu hin tuban i Kochuam sung uh hi hung kidanglam zo ding ei vei. Ziakiakchun, Hotute le Naupanglam diak diak vâng a bul kipatnau Kochuam khanletna ding leh masawna ding in nangma ah kinga a hi ti hezing inla, Lalpa'n thiamna, pilna ahun piak hi thei tawp sua ah gunchu tak ah pang le chin la sep gimna chu thawn puan a Lalpa'n a ti'i.

Pathianni Sikul naupang lam hotute

Naupang lam hotute'n i hiatsa'u himaleh ngaitua thak kit hitiu, Hotu la pang a hi maithei, la panna hi thil neu a hi puai, taksa leh thagau lam khanletna ding

ah naupangte enkawl la hi ziak in, mihiam in pakchalo ma leu Lalpa'n a pakchatlo ging kin la, theitawp in kukal tak in pang le chin i Kochuam uh hi nang ziak in Pathian ginna leh hiatna lam ah hung khanglian ngei ding a hi ti he zing in.

Thukhakna : Pathianni Sikul hi Piting lam leh Naupang lam hi pha tak cha i zil ua phat pi di i tup chiat phawt ua chun i Kochuam uh hi mu thei ah hung masawn in hung kidanglam ngei ding a hi ti ginchak a um hi.

Pathianni Sikul i zilna ziak uh hi hiatna leh ginna dik tak nei theina ding Pathian thu Bible daw dan gual ah hinkhua matna di leh Khristian thugin hemillo ah vawp zing dingin kithunun inla, thasuaklo ah la vawp zing chun Kochuam ah mipha tak la hi beplo in khua leh tui ah le mipha hi'n la tin, Khristian hindan pha leh Pathian zâ dan leh Biak dan le hian la tin la damsung hun chawmcha sung ahin lungawina leh kipakna'n mang inla tin, la gin Pathian le la chung ah kipak intin maljawlna tamtak in hun thuum ding a hi.

Simtu zosia a thak in Lalpa'n malsawm ta hen.

NATIONAL EDUCATION POLICY (NEP-2020)

*Tual Upa Dr. Soilalsiam
Principal R.M.H.S*

Gênlatna: National Education Policy 2020 kiti hi India ah thiamzilna te sân danglamna ding ah dân thak *Ministry of Human Resource Development, Government of India* in a hun guanggal a hi. Zia guanggalna hin naupang school kêi pan te apat *university* tiang ah thiamzilna siam danglam ding a hi. NEP-2020 guanggalna hi lekhabu pêk-66 hial ting ah siam a hia; pêk 1/2 ah lâkchawm di hi a haksâ. NEP 2020 in a gen khenkhatte; a bîk ah school thiamzilna, thîl khawm ding i hi'û. Thiamzilna sâng lam - college leh university, chuleh zia policy zuisaktu ding ah thuneina nei (*implementation*) leh a dang dang te chu ki gen zolo ding a hi.

Mihing in ama ah thil hi theina umte, kim tak ah a mat phatchuam theina ding leh gam leh nam a ding ah mi phachuam hina ding in, thiamzilna a pawimaw bep hilo in, alo theilo a hi. Khawvel ah gambung chuam chuam i et a hi chun, chawndân kepbitna, gam kipumkhatna, *Science* lam ah khantona chuleh nei leh lam ah khantona te a hin India in mâ a sawn ah, masawn to zêl na ding ah châbi chu thiamzilna pha khangthakte

kiang ah piak hi a hi. Gam ah hausakna (*natural resources*) leh mihing thil hitheina (*human resources*) chuam chuam te sukpunna ding leh siamphat zêl na ding ah lampi pha pên chu thiamzilna pha a hia; zia hin mimal tin, *society*, gambung chuam chuam leh khawvel a siampha bawk a hi. Kum 10 zaw leh khangthak tamna di pên gam chu India a hia; thiamzilna pha piak leh piaklo dân in, India gam tûnung dinmun di chu a kingâ a hi.

Thiamna leh hetna lam ah hin khawvel hi nasa tak in a kisâng danglam ta. Science leh *technology* ah khantona: *big data, machine learning* leh *artificial intelligence* te ziak ah hin, thiam neilo mihing nasep (*unskilled jobs*) tamtakte hi *machine* in hung sângtha di dinmun in a um ta a hi.

Zia chu a hi zing laiin, thiamna tawh nasêm ding, a diak ah *mathematics, computer science, data science, artificial intelligence* leh thil chuam chuam *science, social science* leh *humanities* thiamna sâng neite chu pawimaw deu deu ding a hi.

A lum leh vawt kitheng danglam, thil thiangolo pung hât mama (*pollution*) leh siatlam manaw zing khawvel a hin, thiamna thak thak lam chuam chuam in a pawimaw to zê1 hi. Zia bân a chun khawvel huap ah siatna (*epidemics*) hipi lêng (*pandemics*) te apat kivên bitna ding in thiamna thak thak a pawimaw zêl ah: a bîk

in gamlian India a ding in lam chuam chuam ah thiamna hi a pawimaw diak hi.

Thiamna thak thak pawimawna a sâng dungzui in, khangthak te hin thiamna a zil bep uh a hun ta pua, thiamna bang gual ah zil ding a hem? ti a zil masak uh a pawimaw masa ta a hi. Ziaziakchun, thiamzil hin a huap let sâng in, haksatna suvengthei di leh ngaituana mang thiam di lam ah masawn a pawimaw a, thil thak leh matchâk thei mûdaw be zêl ding ah zil a pawimaw ta a hi. Zia bân achun, thiamzilna hi a thu mai hilo a, a tak ah bawl/sep, huap kim, ki zawpmat, ngaituana sâng leh naupang a ding ah thanawp um a hi ding a hi.

Tup leh ngîm: 2040 tiang ah India thiamzilna hi khawvel ah a sâng pên a hi di chu National Education Policy 2020 thiltup chu a hi. Zia *policy* hi thiamzilna chiadân leh kilepdân siam thak leh siamphatna ding ah *Sustainable Development Goal (SDG4)* tawh kithuaivuat

HINNA VÂK

ah siam a hia. A kingakna (*foundation*) ding ahileh India chawndan, ngaikhawk thil leh pawimawte (*India's traditions and value system*) ah kinga ding a hi. Malai Indiate thiamna leh ngaituana hausa tak chu zia NEP2020 puihuaitu ah mat a hi. Malai apat Indiate chawndan a chun hetna, pilna leh thudik chu, mihingte a ding ah dawium pên ah ngaih a hi.

Malai India ah thiamzilna in a tup chu thiamna neina ding bep ala hi pua, mani kihiat chianna ding leh mani zalênna ding a hi. India chawndan leh thil thildân hin khawvel pum ala sukkhâk bep hilo in, thil amtak ala puihuai a hi. Zia pupate apat golul kidawng hi suhing thak kît di leh siamthak kît ah, NEP mangcha/hawtheng ah phachuam tak ah mat hi ding a hi.

NEP 2020 kisiam zia chu mihing pha, lunggêl dik leh nasem pha, ngaituana mang thiam, kigawpkhawm lungthim pu mi siamdaw na ding a hi. Atup khat kît

chu India Dân Bupi dungzui ah lang neilo, huapzo, mi lawting, gam â ding ah ginum leh phachuam siamdaw a hi.

NEP in a ngai pawimaw chu thiamzilna, malâi India chawndan ah zungkaih a hia, zia chu Bharat, India kiti, siamthakna ding ah, thiamzilna pha mitin huap ah piak a hi. Zia kipat hin zillaite'n India Dânpi leh Gam leh nam ngaiatna leh zâna lian tak a nei uh kineppi a hi'u.

Chun, zillaite'n khawvel kisâng danglam zing a hin, a mawpuakna'u leh a sep di dawl uh a hettheina ding uh a hi. India mi leh sâ hînâ kiletsak pi chuleh kitodel thei ding leh khawvel siamphatna ding ah panla thei ding ah naupangte siamdaw a hi kît hi.

School Thiamzilna: NEP hin School thiamzilna ah 10+2 hi siam danglam in, naupang school thiamzilna ding in 5+3+3+4 hi mat tâk ding ti a hi. Zia hin school naupang kum 3 apat kum 18 kikâl huap ding a hi.

Tu ah chiadân

NEP ah chiadân

2 Years (Ages 16-18) CI-XI & CI-XII	4 Years (Class 9 to 12) Ages 14-18	Secondary
	3 Years (Class 6 to 8) Ages 11-14	Middle
10 Years (Ages 6-16) Preparatory to CI-X	3 Years (Class 3 to 5) Ages 8-11	Preparatory
	2 years (Class 1 & 2) Ages 6-8 3 years (Anganwadi/ preschool/Balvatika) Ages 3-6	Foundational

Zia mattheina ding ahin *Anganwadi Centres* mun te hi In, van matchâk (*infrastructures*) naupangte kihelna thilte (*play equipments*) leh zilsaktu thiam (*trained teachers*) tawh sukhât hi ding a hi. *Anganwadi* zosia chu In kilawm, huithiang dawng, kiningting leh naupang hîpthei thilte leh kihelna thil chuam chuam tawh guanggal hi ding a hi. Chun, *Anganwadi* munte hin akiang nai ua Primary school leh a zilsaktute’u tawh leh hun mangkhawm sek ding a hi’u. A hun matna te’u ah nu leh

pate chial in, School dangte tawh kizawpna hawitak nei chiat ding a hi’u. *Mid-day meal* hawitak ah piak hin tin uh, naupangte damtheina leh khandân (*health check-ups and growth monitoring*) etthâk hi zing ding a hi.

School chawlsan (*drop-outs*) naupang hi Class tin in a um sek ah, ziate lâklût kîtna ding leh school chawlsan umlo na ding in zia gual ah hi panlâk hi ding a hi. Pakhatna ah, naupang zosia lunglût theina ding van matchâk bukim school zosia’n a nei

HINNA VÂK

ding a hi. Government school te le siamthak kît hin tin, school building leh a mun suklet ngaite suk let ding, naupangte, a bîktak ah numei te, bit tak leh a bailam thei pên ah chiasuk-chiato theina ding te leh hostel kitûp takte a um ding a hi. Chun, naupang in lekha a zil nuam phawt uh chun, a kum dungzui un khawitak school a le lût thei ding a hi'û.

A panina ding in, naupang kum 18 nuailam zosia zilna mun khat popo ah a kikhum lût chiat ding uh a hi. School zosia'n *Councillors* leh *trained social workers* nei in tin uh, zilsaktute tawh chawllo ah naupang zosia'n thiam a zilna ding ua pan a lâk ding uh a hi.

Zilna munte a hin pau pathum (*three language formula*) mat ding ti a hi. Pau mat di pathum lak ah pani chu India ah kipan pau a hi ngei ding ahia, zia chu *state* te leh naupang te dawitêlna hi ding a hi. India chawndân suk hausak zêlna ding leh gam kipumkhat zawk na ding ah India gam mi pau ngei mat

ding ti a hi. School naupang zosia'n '*Ek Bharat Shrestha Bharat*' kaihuaina nuai in India pau zilna ah pangchiat ding ti a hi. Chun, Sanskrit hi school naupang a niampên apat zilna sâng lam tiang ah zilthei ding ah lemkuat hin tin; a bailam thei di pên leh lunglût umthei di pên ah zik hi ding a hi.

School ah lekhabu zil di zosia (*syllabus*) a niampên apat siamthak vêk ding; zia chu India gindân, chawndân, thil thîldân, ngaituadân, pau/paudân, masang hetna leh ngaisân lamte ah kinga vek ding a hi. Lekhabu (*text books*) zosia hin gam a ding ah thu pawimaw (*national important*) te chuang ta ding a hi.

NEP 2020 in bawl tei tei ding ah a gen kît khat chu school kilometer 5-10 sung ah umte kietkawlna khat nuai ah gawpkhawm a hia; zia chu *school complex/cluster* ti a hi. Zia hin Secondary school khat nuai ah primary school te leh Anganwadi te huapkhawm ding a hi, vaihawmtu khat in

enkawl ding a hi. Zia *school cluster* in a tup chu school thil neite kikawp, kietkawlna hawizawk na ding, thunun leh kigual tak ah ki vaihawmna ding ti a hi.

School Management Committee kiti chu *School Complex Management Committee* ti hi ta ding a hi. *District Education Officer* leh *Block Development Officer* te chun *School complex* te chu school khat gual in enkawl in, kithuapi ding a hi' u.

Thukhâkna: Thiamzilna pha hi a pawimawna leh gam leh nam, insung leh mimal tin khantona ah pawimaw a hi dân chu gentam ngâilo ah, i hetsa vek a hi. Khawvel ah thiamna sân dungzui ah thiamzil dân le suk danglam to zêl a hi. Eilak ziang ah le kum 20 masang thiamzilna tawh tûlai thiamzilna hin ki batlona tamtak a nei ta'i. Khawvel kisâng danglam zêl ah thiamzilna le siamphat

ngâi zêl chu a hi. NEP 2020 i gênlatna pat hin, - a phatna leh phatlona di te, ngaidân i siam chiat uh ginchâk a um hi.

Chun, ngaitua kham ting khat chu, zia guanggalna in a tup zosia hi suk pitin thei a hi na diam? India mi zosia'n a phachuampi na diam? *Minority* te- a diak ah sakhua lam, bangtin a sukha diam? '*Unity in Diversity*' a panpi tak tak na diam? A bang chu hileh, India chawndân ah zungkaih thiamzilna hi i masang ua maitua ngêi ding i hi' u tau ah, insung ah cha leh nau etkawlina leh Chanchinpha thuhilna lam ah nu leh pate'n, pan nasa zawdiak ah lâk pawimaw ma ma ding a hi. '*India chawndân ah zungkaih thiamzilna*' ti hin India ah sakhua neu dangte, a bîk in gingtute ei sukha ding a hi ziak in; '*chanchinpha' zungkaih Insung kithuhilna*' chi tû masak ngêi ngêi gaw chiat hi ti' u.

KHANGLAITE LEH SAKHUA

(1 Timothy 4:12; Jacob 1:26-27)

~ Rev. Siamlalron

Simtu zosia Jesu min in chibai!

Zia thupi pawimaw tak zik ding ah dawisakna ei pia Pathian leh puitute chung in kipakthu ka gen masa ahi. Zia thupi hi thu hiat ngailo ahi pua, i hiat zing sa uh himaleh i phatchuampi thei ding pen un ngaituana mang in sim hitiu.

A thupi i hiatchian zawk diak theina ding unkhanglai leh sakhua kiti hi chawm cha'n vak hilchian chian masa hi tiu:-

a) Khanglai: Khanglaite kiti hi ei Kochuam chun numei leh pawsal kum 14 ah kipat kum 40 kikal ti'n a gen hi. I chênnau gam India in a pawm dan in numei leh pawsal kum 18 ah kipat kum 24 kikal te chu khanglai (youth) ti'n a gen hi. Zia hun hi sana khang, hun mantam leh hun lul a hi.

Khanglai hun hi hun pawimaw leh hun dawi um tak a hi. Himaleh a mang khial te a ding a chun damsung ah kisikna ding bawl daw hun a hithei hi. Ziakiachun, khanglai hun hi bang lam lam ah le pilvang tak leh kithunun zo tak ah hinkhua mat hun a hia, ngaisak ding dawl ngaisak ah, nutsia ding dawl nutsia na hun a hi.

b) Sakhua: Sakhua kiti hi mihing khat in a ginna ahilo leh a taksan ziak ah a Pathian uh a ho leh biakgenna a hi. Khawvel ahin sakhua chuam chuam tamtak a um ah, zia lak a chun Khristian Sakhua zui hi khawvel in a tampen a hia, mihing zosia lak ah 32% vai hi Khristian sakhua zui hi ah gen a hi.

Mihing hinkhua ah thunei pen leh lungthim lua pen pakhat chu sakhua hi a hi. I sakhua umna i ngai khawk leh ngai khawklo hin i hinkhua ah thil tamtak a gen hi. Ziakiachun, bang sakhua zui hile hin le i ngaikhawk leh ngaikhawklo hinmimal leh sungkuan hinkhua ah thagau lam leh taksa lam dinmun a sukha ma

ma hi. Pathian neilo chun sakhua a ngaisak pua, Pathian nei diktak te chun sakhua a ngaisak ua, a ngaikhawk ma mau hi.

1. Khanglaite leh khawvel masawwna:

Khawvel khantona leh masawwnatehin mihing hinkhua leh nisin khawsakna ah thil thak tam tak a hun paw lut ta. Khanglaite lak a hin masawwna leh khantona chuam chuama hung lut nasama ma tai. Zia masawwna lak ahin Smart Phone leh Internette hin khanglaite hinkhua a sukha diak hi. Zia thilte hi umlo ah nisin hinkhua mang thei talo a kitam tai. Tamtak te chun nasepna leh sum leh pai hawlna ziang inle i mang phachuam thei tau ah kipak a um ma mahi. Zia chu a hizing lai in a hun tawk hiatlo diak ah siatna leh thagau lam ah kiakniamna mang le a ki tam ma ma tai. Khawvel khantona te hi Pathian lopina ding leh i masawwna ding zawk ua mat phatchuam dan theitawp in kizil zel hitiu.

2. Khanglaite leh Sakhua:

Khawvel khantona diak in khanglaite lak in sakhua lam ngaisak na a hung niam deu deu ta, khawvel thil ngaikhawkna

leh pawimaw sakna a hung lian zaw diak ta a hi. Ziagual dinmun ah i um zing lai ua hin mimal, sungkuan leh kochuam in theitawp sua ah pan i lak uh a ngai tai. Sawlchâk Paul in Timothy kiang ah a lekthawt na achun, “La khangdawng hina hi kua ma’n hun musit ki hen; himaleh, paudan leh tawidan, hepina, ginna leh thiangthonate ah chun gingtute ettawn ding in um zaw ta’n (1 Timothy 4:12), ti in a thuhil hi. Zia thuhilna hi tulai khanglaite a ding in a pawimaw diak in a kilang tai. Bang lam lam ale kithunun zo ding leh ettawn tâk ding in Khristian khanglai te’n pan lathak zel hitiu.

Bible in sakhua ngaisak ah a gen te chu a kam veng tup leh lungthim thiangtho pute a hia, chuleh sakhua thiangtho leh sukbuaklo chu nauchate leh meithaite a genthei lai ua kanthâk leh khawvel kisukbuak saklo hi a hi a tia (Jakob 1:26-27). Sakhua ngaisak ah kigen ngal ah a kam vengtuplo, thutakna neilo chusakhua bangmalo ahia, ziagual ma chun sakhua ngaisak kahi ti ngal ah mi haksa zaw te lungsiatna neilo, nauchaga te leh meithaite ngaisakna chang helo

HINNA VÂK

chu sakhua mi tak tak hitheilo a hi. Ziakiakchun, sakhua i ngaisak masang un thagau lam hinkhua kisiam fel in, eima ah Thagau Thiangtho umsak thei ding in theitawp sua ah pan la in, Thagau lam hinna diktak nei masa hitiu.

Khanglai tamtak bangkim ah fel, kipezo ma ma himaleh ama ah Thagau Thiangtho a umlo zia ah dai sawtlo, haksatna leh thepna neucha a hung um phat leh pûk kîr pai ziang, Sakhua mi ma ma himaleh Pathian ah hinna tak tak neilo ah um khak thei hi. Bible in a gengual in, ‘a gam leh a dikna chu hawl masa tau in; tichun zia thil zosia chule piak belap in um in lau’ (Matthai 6:33) a tia, Pathian nei pum in sakhua ngaisak phawt leu hin Pathian in mihingte i pawimaw uh leh i dinmun ding uh chu a he ma ma hi. Bangkim ah Ama muang zo in a hun ngak zo ding in pan lathak hitiu.

3. Thukhâkna:

Salvation Army phudawktu William Booth chun khang hung um zel ah thil hung tung ding ah agen te lak ah pakhat chu, ‘Thagau Thiangtho panglo ah sakhua’ ti hi ahi. Zia

gênlawkna hi tulai dinmun tawh et in a dik ma ma tai. A sudik tu ah pan khâk ding kiveng hitiu. Pathian neilo pum ah kochuam ah mawpuakna pawimaw lai lai tu, pawlam kilat dan ah thagau mi ma ma, a sunglam ah ngawnchang hi khak ding kiveng zing hi tiu. Thugentu in agen gual in, i thilbawl zosia hi Pathian vaihawmna ah puilût hi ding (Thugentu 11:9) a hiziak in pilvang a ngai ma ma hi. I Belam etkawl teu pui khial tu hilona ding in Thagau ah hinna diktak nei hitiu.

Khanglai hun sung ah Pathian kinei ah sakhua lam lunggil tak ah ngaisak tutechu Sam ziktu in a gengual in nu leh pate kinepna leh midangte a ding tiang ah malsawmna a hi thei ui. Sam ziktu chun, “Ka chapa teu chu a khangdawng lai un thingno khan phatak gual in um uh hen la; ka chanu teu chu leng insakna ding ah khuam kizêm, hawitak gual hung hi tau hen” (Sam 144:12) ala ti hial a hi. Ziagual ah nu leh pa leh sungkuan te kinepna hithei ding in I thahat lai uh, I khanglai hun ua hin Pathian nei in fel tak in sakhua ngaisak hitiu.

KITHAWINA HING

(Mikah 6:8)

*Rev. Andrew L.R. Kiangte
i/c Mata Pastor Bial*

Tulaitak i chennau khawvel hi thîl in gingtute hin thil tak tak buaipi ah lutchil a hun ta ma mai. Lal Jesu hungkitna ding hillawkna tamtak thilte i tuak in i hinpi to zel hi. Thu a i sim leh i gen sekte chun a tak in ei chenchil tai. Zia nung ah hin Pathian i biak leh gin dante hile thîl chian ngai ma ma leh a kilawm hi. Ei uh Tangphai Provisional Synod hinle Pathian maljawlna zal i zo ua, a Kochuam ah chen nuamsa in i tha'û a muang ah, '*Ama a kilat hun sînleh lopiin kilang ve hitiu*' ti ah la siamtu in a gen gualin Kochuam neitu zâl ah a Kochuam te hi etlawm in, a châng leh a neitu liahkhu hiau hiau hileh kilawm ah kilang a bang sek hi. Kochuam hi lampi chuam chuam ah masawn i tup zing lai ahin Pathian dawigual ah nasep a pawimaw dan hi hiatmil a thiangolo a hi.

Zawlnei Mikah kiang ah Pathian thu hung tung kha i hiat leh ngaihthak zingsa ahia, tamvei tak le sim kha tai tiu. Israel chate fellona chuam chuam chu a masang ua lîmet kichian tak kawigual ah kichian in puandaw in a um a hi kha. Ziatak ah Pathian in a phût - **Dik tak a bawl, Lungsiatna ngainat leh Thunuaigawl tak ah Pathian tawh kitawn** te hi Pathian âng ah kithawina hing

i lat theina ding in chawmcha'n ngaitua khawm hitiu.

Dik tak ah bawl :

Zawlnei Mikah hin a hunlai khawtang ah diklona chu a dodâl nasa ma ma hi ti Bible apat in i mu thei hi. Mi gentheite dinmun haksat dan le a taklang hi. Ziagual ah diklo tak ah bawlte chu gawt ahi ding thu nasatakin a puang hi. I khawvel mu phak ve tiang chan hi ngun tak ah ngaitua

HINNA VÂK

in thîl lehin gawt ngai khawp ah diklo in vai i hawm kha ta em ti kietchian a hun ta ma mai. I kamsuak in migenthei leh nuainung zawte a kawi pawimaw ma ma lai ahin amau ah a taka masawna mu ding a um em ti hi dawtna lian tak um thei chu a hi.

I vaihawmnau neupen ah kipat a sangpen tiangin kisuichian sek hitiu. Dik bukim khawlo va bawl hi a tam tho hilo maw? I kihiatthiam tua ziak ah dik beklo lehle malak ziang sek hi i hau uh em? Phatchuampi ding kinepna munle hilo ah lawkna ding hawl ham ham, ngaidam ziang thei tho hilehle neukhat bek vak nêk gaw ham hamnate la nei em? Mi ei hiatthiam zing ding ngai in nâ i sem sek em? Negute dem ah i gensiat zing lai in mi hiat kham beklo mun ah nekguk khawksa diaklo i hui em?

Exodus 23:1-3 ah khenchuam neilo ah diktak ah vaihawm ding ah thupiak a um ah, zia tak ah a gen pawimaw tak pakhat chu thuthang diklo gensawnlo ding ti leh hiatpitu

diklo tak hilo ding ah ziltina a ni. Zia hi tulai khawvel media hat ma ma tâk nung ahin i lungthim ah um thak leh pha ma ma in a.

Diktakahthilbawlgahii nisîn hinkhua a kilatdaw a pawimaw hi. Kochuam huangsung ah rawngbawlna nasep i sepna ahiloleh khawitak mun a h'em bik ah diktak ah bawl bep mai ding i hipuau. Dikna hi hinpi zawk ding a hi. Diktak ah i bawlsekna ga chu i mihingpите ah a kiklatdaw ding a hi. Dik taka bawl hin mihing leh mihing kikal ah kilaichinna pha zaw siam intin zia chun mihing leh Pathian kikâl le a siamphat ngei ding a hi.

Pathian in mihing ah kipat a phût pawimaw masa chu dikna hi a hi ngal a. Pathian kiang ah kithawina hing lân ding chun i nisîn hinkhua i thilbawl taphawt ah '**dikna**' i panpi ngam chun Pathian mitmu ah dik a hi em tia i kitê zing hi a pawimaw ma ma hi.

Lungsiatna ngainat :

Lungsiatna ngainat ti hi dik taka bawl ti hi tawh a kizui hawi khawpmai hi. Lungsiat ding

dik i lungsiat hi a pawimaw takzet hi. Bible zilna lam ah chun zia thumal **'Lungsiatna'** hi **thilbawl** tawh kizawpmat, ngaituana leh bil ah hiat ah kichian mai chi a hipuai ti in a gen u'i. Luka 6:36 ah chun *"La Pau in mi a lungsiat gualin nang un le mi lungsiat un"* ti ah zik a hi. Pathian lungsiatna hi bang gualin a h'em kei hin ka chan ti ngaitua kawm in lungsiat dan i zil uh a ngai hi ti na a hi chu!

I phatchuampi thei dingte bep lungsiat zianglo in, amau apat bangma kinepna ding i neilote chung ah lungsiatna latsak hi lungsiatna latsakna diktak zawk hi in a kilang hi. Ziagual lungsiatna ziak ah hukdam i hi ziakin zia lungsiatna lampi chu gingtute haw ding a hi. Mikah chun a hunlai ah sakhuana chu demin, thil pawimawlo leh kithawina umzia neilote chu hâpi'n a gensiai. Pathian in a dawî leh a phût zawk chu a min mai mai ah mi mu ah ama gingtu leh nasemtu hilo in nungchang dik ah lungsiatna ngai pawimaw a hi. I lungsiatna mamaw ngawi

ngawitute'n zia chu i kiang ah kipat in a dawng uh em? Ka lungsiat chulam ti kawm ah a hatlonau leh zawngkhalna laite holimna'n i mat piak zing sek em? Mi chuam chuam i kikawpvaipi leh maituate hin lungsiatthei mu in a h'em ei mu ahiloleh mi ngai pawimawlo gual in.

Kochuam nasepna bak chuam chuamm ah te hinle lungsiatna hin bang tiang ah mun pawimaw a chang em ti i etchian zing sek a pawimaw ma ma hi. Lungsiatna bep tena ah mang ah Pathian nasep leh nisîn hun mat hi Pathian dawidan leh kipakpi chu a hi ngeiginchat a um hi. Lungsiattu bep hilo in lungsiatna hinpi leh ngaina mi hi chu tulai khawvel se ma ma ziangta ahin a pawimaw khawpmai hi. Zia chu pathian pawmtâk kithawina hing Pathianin a phût pakhat chu a hi.

Thunuaigawl tak ah Pathian tawh kitawn:

Thunuaigawl ti hin a kingainiam zawk leh zuitu mai a hi dan a taklang hi. Mani dawidan sâng ah ama thumat

HINNA VÂK

leh dawidan ngai pawimaw hi zia thumal hin a kawk chu a hi. Thunuaigawl tak ah Pathian tawh kitawn ding chun Pathian dawidan leh a thu gual ah i um a ngai a hi.

Pathian tawh thunuaigawl tak ah kitawn ding chun Pathian hiatchian leh mani khiatchian pawimaw ma ma in a. Pathian hechiente chun Pathian masang ah a bangmalo a hi a kihechian ah, a chapo thei pua a kingaitawm zaw sek a hi. Ziagualma chun mani khiatchian hi a pawimaw ma ma kit hi. Mi mani kihechiente chu kingaitawm in a chapo ngai puau. Ziagual dinmun apat chun thunuaigawl tak ah Pathian tawh kitawn hi a hithei bep hi.

I Pathian nasepna ah hin mani dawidan leh phasak i nei veu sek zia ahin Pathian tawh i thu a kimillo zing ding a lginchat um hi. Pathian hi i bangkim ahia, banggual hung tung lehle Ama'n ei hiatpi a, ei thatham ngailo a hi ti hiat a, a nawp leh a haksat hun ah le Pathian ah kinga phawt ziang mi chu thunuaigawl tak

ah Pathian tawh kitawnte chu ahiau. I tulai khawvel - mihing guanggalnate thawn zing leh i dawidan gual ah i um theilona hun ah hin Pathian tawh thunuaigawl tak ah kitawn hi lungawina leh i hun tuak pawm thiamna hi ngei in a, zia chu Pathianin ei ah kipat a phût pawimaw tak a hi bawk hi.

Khaikhawmna: Pathian dawigual kithawina lâtna ding ah chun Pathianin ei ah kipat thil haksatak leh mantam tak, i titlona dingte ah ei phût chuam diak puai. A hingut hi maw! ti kawm ah i zawp ngal thei ziang dingte zawk chu Pathianin ei ah kipat a phût kithawina hing leh a kipakna chu a hi. Kilawm tak ah kichei ah Biak In chia, Kochuam nasepna bâk chuam chuamte ah tawmngai tak ah sêm a, mundang ah hindan chuam kit tite hi kithawina lêm mai mai a hi. Ziaziakchun i Pathian nasepna ah hin Pathian pawmtâk kithawina chu bang a hi em ti zilchian in mani mazawn chiat ah masawn tup leuhin Pathian dawidan kithawina hing lân chiat dingin kisingsa hitiu.

PHÂKNA TIANG AH KIPAT MASAWN

(Phil 3:16)

*Rev. Ngurthanmawia Sailo
i/c Imphal Pastor Bial*

Sawlchak Paul hin a thugen kichian zawkna ding in gualsiak Skidemna chung chang hi a gen sek a, ziatak Bible chang ah hinle gingtu hinkhua chu kitaisiakna chungchang gualin etsakna'n a mang hi. Lekhathawt dang ah le gingtute hi kitaisiak gual ah a genna i mu sek bawk hi. Kitaisiakte chun kipakman a mu theina dingun theitawp a sua sek ua, tupna mun tiang tun masang chu nunglam ah kihei loin a malam ua hattakin a tai seku'i. Nung lam a kihei zing uh chun midang in taikhel in, kipakman a mu zo ngaipuau. Gamla tak taitungta maleu tupna mun tiang a tunlo chun kithada thei a hipuau. A kithada uh chun a nung ua mite'n a hun tai pêl ua, a kipakman dingu a mu thei ngai puau.

Zia chu hia in sawlchak Paul hin le a Pathian nâ a sep zinglai ah khan malam zuan zel ding a hi ti a kihia, ziaziakchun "A mu zo ta ka kiti pua'n, bukim ta le ka kiti diak puai; Khrista'n ei matlawna pen chu ka tukdet theina ding ti'n, ka del ham ham a hi zawi" a ti'i.

A hina tak ah chun sawlchak Paul in Pathian nasepna ah a phâkna tiang gual hi phata hileu hin mi tamtak chun ziagual kampau hi i mat uh ginchat a um puai, fel leh pha, chang sang ma ma ta i kisak uh ginchat a um hi. Paul hin a hinkhua ah khan suan ding a hau ma ma hi. Juda mi, Rom khua leh tui hina nei bawk ahia, dan he mi, dan hilchiantu lak ah mi a hi. Sakhaw lam ah Khristiante sawisatu ahia, kona a dawn dan kha le a kichian ma ma, vâk in a khaw puk a, direct a Lal Jesu kona dawngtu a hi. Thagau lam ah le a chang sang ma ma, thilmak bawl theinate, damlo sukdam theinate,

HINNA VÂK

mithite kaitho in Kochuam le a phudawk tam ma ma hi. Chuleh van sawngthumna tiang ah lakto in a um a hi kha. Ziagual ah mi lopi khan “A mu zo ta ka kiti pua’n, bukim ta le ka kiti diak puai; Khrista’n ei matlawna pen chu ka tukdet theina ding ti’n, ka del ham ham a hi zawi” a la ti bep mai a hi kha. A hinkhua ahin “ka bawl tai, ka sem tai’ ti ah ama kihiatna lam kha a um puai. Malam sawn zel a nuam ah, hiatbe zêl a nuam hi. Ziaziaak chun “Banghitaleh, i phâk taksau tiang uh chu tudet in malam sawn zel hitiu” ti in a gen a hi.

Pathian nasepna ah hin panlakna ding lampi tam tak i nei a, ila bawlsa le tamtak um ding in ginchat a um hi. Himaleh, i bawlsa leh sepsa ah lungawi leh dawikhawp zianglo in malam sawn ah i phâk taksau ah kipat chia zel ding ihu ti hi vâng hiat zing pawimaw in a. I Kochuam dinmun et in a tangpi’n ma i sawn zinglai in pan lakna ding tamtak i nei u’i ti i hiat uh ginchat a um hi.

Kochuam member i pun zêl theihna ding un nasatakin ma la zing hitiu. Kochuam member le i tam naipua a, tulaitak hin member hi 19294 i hi pan bep nalai u’i. I punbe zel theina dingua panlâk hi i bawl mâkmaw uh a hi. Zia chungchang ahin Pastor-te leh Upa te bep hilo in Kochuam mimal tinte’n mawpuakna lian tak i nei u’i. Kihawng takin, fel tak leh dik takin, i Kochuam mi leh sa ala hisate hung kilekit theina ding ah ma lak nasat ma ma pawimaw leh a kilawm hi. Chun tulai khawvel ahin mi tamtakte’n cha nei tam i pei tapua a, ahinla gil tak ah i ngaitua chun a NAM gual ah gel inle cha hi tawm cha cha i nei uh chun i nam hin pun lam sang in tawm lam manaw ding ihu. I nam i Kochuam i pun zel theina matchâk pawimaw tak chu Cha nei tam hi a hi. Zia chungchang ah hin ngaituana thak tawh malam sawn zel hitiu.

Thilpiak lam ah chun i Kochuam hi ma i sawn nasa ma ma, thil kipak-um tak le a hi. Himaleh zia hin hunsak

ziang naipuai tiu. Kochuam mipite'n sawma pakhat piak nasa zaw sem ah panla hitiu. Oswalt J. Smith chun *"Ningkum ah la piak zat ngaima la pia, la pauchap zat ngaima pauchap la hi chun Pathian gam hi letzêl da hen la tina a hi"* a ti'i. Kumlui sâng ah tam zaw Pathian â dling in pia hitiu. Lal Jesu'n "Piau in, tichun nang uh le piak in um in lau; phatchuamngai tak ah te'piak in, a sawt ah sawn chak in, a law ah lawkchak in, a dimlêt hial in la ângsung ua sun piak in um ding la hiu, mi la te'piaknau ngaima a chun nangmaule te'piak ah um ding la hiu," a ti a hi (Lk. 6:38).

Kochuam mipite'n Pathian biak kikhawp lam ah pan nasatak ah lak a pawimaw ma ma hi. A tangpi'n nu lam chu a pha tangpi ua, khanglai leh papilâte a bik in kikhawp lam ah tu sâng ah pan i lak nasat zawk uh a pawimaw leh a kilawm hi. Kikhawp hi thagau lam an pha mi'n a dawnna mun a hi. Mi'n an ne ding ah dawkan a zawt peilo chun gilkiäl in a um sek hi. Ziagual bawk chun mi'n

biakin lam a ngaisaklo chun a thagau lam hinkhua a gilkiäl a, a chau ziang sek u'i. Kum chiatasa sangin tukum ah hin kikhawp ngai pawimaw zaw diak hitiu. "Mi khenkhatte gual n i kikhawpnateu haisan lo in, kitilhat tua chiat hitiu, ni chu a nai tai ti la het ua leh kitilhat tau in." (Heb. 10:25)

I kochuam hin kipumkhatna pha neina ding lam ah ma i sawn a pawimaw ma ma hi. Kochuam committee kikal ah te, khanglai pawl kikal ah te, kochuam numei pawl kikal ah te tu sâng ah kipumkhatna pha a um theina ding ah pan i lak uh pawimaw khawpmai hi. Gam leh gam a kido ah, gam a dindaw theilo gualin, Kochuam leh Kochuam kikal a kilunggualna phalo hin Kochuam a niamkiak sak thei hi. Zia ziak chun Tangphai Provisional huam sung Kochuam chuam chuamte'n kipumkhatna phazaw i nei theina dingun mâ la zel hitiu.

Luandawna lam ah i masawm uh a pawimaw hi. Tui luang dawklö chu a thiantholo sek gual ah hin gingtu leh

Kochuam luang dawкло chu a thiangtholo tei sek hi. Taksâ ding ah pha tak tak ne zing ngal, himaleh khawsa pawt khawp a tawilawк kit diaklote chun taksâ ah haksatna a nei kit thei sek u'i. Ziagual chet ah chun Kochuam le Pathian malsawmna dawn nuam ngal ah i luandaw diaklo chun Kochuam â ding ah a hisêl sek puai. I Kochuam ah kipat Pathian nasem bangzat a

pawtdawк tam, missionary bangzat i chawm em? tite ngaitua kawm ah ma i sawn zel pawimaw in a.

Zia haw zosia ban ahin gen ding tamtak um thei in a. Bang hilehle tu ah i dinmun ua hin lungawi zianglo in i phâk tâksau ah kipat masawn ding gua in Kochuamte'n sêm zel hitiu. "Banghitaleh, i phâk taksau kipat khan ma sawn zêl hitiu".

KIPAKTHU GENNA

K. Pyar's Microenterprise, Kochuam lekhiabu 'Hinna Vak' ei print piaktute chun December 2022 Issue kha a man umlo ah ei print piakna chung un kipakthu i gen u'i. A kiphalnau Pathian in a le tamtak ah maljawl ding in leh Pathian Kochuamte nasepna ah midangte â ding ah maljawlna hizing thei ding in dawisakna i lan u'i.

~Editor

KIVENG ZING IN UM IN!

"Kiveng unla thepna la lut lona ding un pauchap un; thagau in vang a ngapcha hen, taksa ahileh vang a hatlo a hi, a tia."

Matthai 26:41

German bank nasemtu pakhat hi a customer-te khat bank account ah dangka cheng 62.40 euros transfer dingah a kisingsak laitak ah chun uang in a dawkan chung ah chun a ipmu tha kha ta. A khutzung pakhat chu number 2 ("2" key) chung ah a um laitak ah a ipmut thāk khāk zia kin dangka 222 million euro (300 million dollar) transfer a bawl kha tai. A thil bawlkhial chu siamphat kit thei in um maleh ama beplo a sepkhawmpi dang pakhat zia a sum transfer verified ala bawl pa chu tawh a sepna'u apat haisak in a um tau. A khawningailo zia kun bank ā dingah puakgik a tun khawlaw ta vang hi.

Jesu'n a nungzuite chu kiveng ah pauchap ding in a hil ah, chutilo chun thil bawlkhial in sual in hun man khan ah a ti a hi. Gethsemane kiti mun ah pauchap ding in a pui a, a pauchap lai chun lunggim ma ma in thina khawp hial a hi atia. Peter leh Zebedai chapa panite kiang ah ala vēnpi ding in a dawn hi (Mat. 26:38), ahinla ala ipmut san u'i (vv. 40-41). Pauchap zing kawm ah vēnpi a zau taklo zia k un ama zamsan ding ah thepna a hung tuna khan do zolo in a jam mang tau a hi kha. Jesu'n a mamaw laitak in a nungzuite chu a jam mang ua, thagaulam kivenbitna a tasam uh a hi.

Thagau ah kiveng zing ah i um theina ding in Pathian thu sim in pauchap zing hitiu. Tichun ama'n hung suhat in thepna zosia zo thei ding in hung panpi in a.

~ Marvin Williams

LÂ LEH A CHANCHIN...

PATHIAN EI HEPI DÂNTE HI (K.L.B No. 33) LEH

LALPA'N EI HEPI GUALA HIN (K.L.B No. 479)

A Phuaktu : Pu Khaitinlel

Pu Khaitinlel Vaiphei hi Mr. (L) Mangdong leh (L) Kimneingai te nupan chapa changkhat ahi. 1952 September 23 in Chongkhozo in ala piang a. A suapi numei khat leh a nu'n 1957 kum in ala beisan ah, apa tawh meithai hinkhua kum 27 lam numei bei in ala khawsau hi. A naupan lai in Chongkhawzo Mission School in Class-V a la zo in, Kangvai High School in Class-VIII a la zo in Pand Standard School cccpur in Class-X a simlai in Insung haksat ziaak in lo nâ a la semtai.

Kum 1974 Good Friday ni'n a la piangthak tai. Zu leh khamthei thil te haisan in Pathian thu a kimang in Pathianni sun kikhawppel in Intin a beigual bawl in a pang a, thugen in le a pang sek hi. Pathian Thagau in a kithuapi a khawsung in halna le a tung hi. Pathian Thagau kithuapi na'n La te hun phuak in **"Pathian ei hepi dante hi"** ti leh **"Lalpa'n ei hepi gual ahin"** ti te leh a dang dang Pastor Selkholam sermon te haw Lâ siam in, Gamngai lâte haw le a phuak hi. Insung haksat ziaak in 1976 in Assam Regt. in a la lut in 1979 kum in Pu (L) Thongjang chanu (L) Tingneilam tawh Pastor Khupkholal khut in Kochuam Dan in ala kicheng u'i. Gam buai ziaak in 1997 in D. Phailian khua'n a hung cheng lut a, Kum 2000 in a zi Tingneilam in a la beisan a, Kum 10 val a chang ah ala khawsa, 2012 kum in Pu Lethau, koite ah um chanu lianpen Miss Nengneilhing tawh pindan in a kicheng ui. Sepai a hung pan nung in Chongkhawzo ah Pathian Thagau kithuapina sumdawl a lawsap ziaak in a Pauchap khawm ua leh Pathian thagau in mite lungsung ah thu hung gen in dawl ngailo in Biakin ah a hung thak khawm sak hi. Lalpa lopina ka piai! EOC leh Baptist le hung kigawm kit in Pathian panpina'n Thagau in halna thak a tung kit hi. Hallelujah!

KKP HUANG

MATA PASTOR BIAL KKP

Conference 14 veina
A Mun : Buallian Kochuam
A Hun : Dipi 20th - 22nd 2023
Thupi: "KHANGLAI NAWPNATE
ZAMSAN IN" - II Timothy 2:22
Thupi Gentu : Rev. Andrew L.R.
Khangte i/c Mata Pastor Bial
Kum 2023 - 2024

Puitu thak dingte (OB)
Leader - Tv. Soiliankap
Asst.Leader - Tv.Genbiaksang
Secretary - Tv.Lam Joseph
Asst.Secy - Nk. Kimsawnhawi
Treasurer - Tv. Songliansang
Finance - Nk. Ruth Lalnunnei



KANGVAI PASTOR BIAL

KKP Conference 18th veina
A Mun : K. Kotlian Kochuam
A Hun : 20th – 22nd Jan. 2023
Thupi : "Aman La Khankhua
ding uh a gel nai". (1Peter 5:7)
Kangvai Pastor Bial Puitu
thakte 2023-24

1. Leader : Tv. Malsawm Vaiphei
2. Asst. Leader : Tv. Lemlal

3. Secretary : Tv.Lalminlian
4. Asst. Secy : Tv. Thangboi
Neihzial
5. Treasurer : Tv. Lalginlian
6. Finance : Tv. Thanglianson



B.PHAINUAM PASTOR BIAL

KKP Conference 21 veina
A hun : 20th-22nd January
2023

A mun : Nongpokphaijang
Kochuam Biakin

Thupi : "Khangdawng in
bangti'n alampi a hitiangtho
thei diam?" ~ Sam 119:9

KUM 2023-2024 PUITU
DINGTE:

1. Leader - Tv. Kamlalmang
2. Asst. Leader -
Tv. Lunmuanthang
3. Secretary -
Tv. Nekmuansang
4. Asst. Secy -
Nk.Thiamthianhawi
5.Treasurer-Nk.Lamthianmawi
6. Finance Secy -
Nk. Tinghawisang

HINNA VÂK

SUGNU PASTOR BIAL KKP

Conference 11th veina
Amun : Sokom P/Church
Thupi : “Neithah sem kit un”
Psalm 80:7

Aphat : 20th - 22nd Jan. 2023
2023 - 2024 sung ah puitu
dingte:

1. Leader : Gl. Benjamin
2. Asst. Leader : Gl. Limminlal
3. Secretary: Ng. Nengneichong
4. Asst. Secretary:
Gl. Paolunthang
5. Finance : Gl. Thonggoulen
6. Treasurer : Ng. Hatkholam



DUMLIAN PASTOR BIAL KKP

Conference 10 veina
Ahun : 20th - 22nd Jan. 2023
Amun : Tuinuphai Kochuam
BiakIn

Thupi : “Thou inla la
Pathian ko in” Jonah 1:6
KUM 2023-24 PUITU DINGTE :

1. Leader - Tv. Paulemhau
2. Asst. Leader - Tv. Arvin
Kaikhosat

3. Secretary - Tv. Nawnlallom
4. Asst. Secy. - Tv. Kaigouchung
5. Treasurer - Nk. Nianghoihlun
6. Finance Secy. -

Nk. Nemngaihchin



K. SHARONPHAI PASTOR

BIAL KKP Conference 9 veina
Ahun : 20th -22nd Jan. 2023
Amun : Kamutangnom
Kochuam Biak In

Thupi : “Ei Zui in.” Luka 9:59
Speaker : Rev. Paulalsiam
Bialtu Pastor

KUM 2023-24 PUITU DINGTE :

1. Leader - Upa Kakap
2. Asst. Leader -
Tv. Thangminlian
3. Secretary - Pu. Gindavid
4. Asst. Secy - Tv. Thanglalmuan
5. Treasurer - Nk. Chongmery
6. Finance - Tv. Thangrouchung



LAMKA PASTOR BIAL KKP

Conference 19 veina

Ahun : 20th-22nd Jan. 2023

Amun : H. Q. Veng Kochuam
Biak In

Thupi : “Ahi’n, vaihawmna
dik tui gual in luansak unla;
diktatna chu lui tui luang
let gual in.” AMOS 5:24

Speaker : Rev. Vanlalchhuanga,
i/c Lamka Pastor Bial leh

Pu Mangzalun, Asst. Leader
CKKP

KUM 2023 - 24 PUITU DINGTE :

1. Leader - Pu Henminlian
2. Asst. Leader - Pu Mangzalun
3. Secretary -
Tv. S. T. Joy Vaiphei
4. Asst. Secy - Tv. Ginlalzo
5. Treasurer -

Nk. Chinthuamkim

6. Finance Secy. -

Nk. Kimthianmuan



MUNPI PASTOR BIAL KKP

Conference 13 veina

Ahun : 20th - 22nd Jan. 2023

Amun : L. Phunchongjang

Thupi : “Suak ngawngkol in
tang kit takiu in”(Galatia 5:1)

Speaker : Rev. Thanglianlal,
Bialtu Pastor

Kum 2023-2024 Puitu dingte:

1. Leader: Tv Lamsonpau
2. Asst. Leader :
Tual Upa Zamsawn
3. Secretary : Tv Lamthianson
4. Asst. Secretary :
Tv. Khailunthang
5. Treasurer : Tv Lamzamlal
6. Finance Secy: Tv Pumminlal



D. PHAILIAN PASTOR BIAL KKP

Conference 15 veina

Ahun : 20 - 22 Jan. 2023

Amun : Bethany Kochuam
BiakIn

Thupi : “Zia hin ka um
hiam, ei sawl in.” Isai 6:8

Speaker : Rev. P.B. Zosaphara,
Consultant (TPCS)

KUM 2023-24 PUITU DINGTE :

1. Leader - Pu Lalginian
2. Asst. Leader - Pu Paulianmoi
3. Secretary - Tv. Thanglemlian

HINNA VÂK

4. Asst. Secy - Pu Francis Mimin
5. Treasurer - Nk. Tinglemkim
6. Finance - Nk. Kimboi



KUM 2023-2024 puitu dingte :

1. Leader - Tv. G. K. Lalneu Suantak
2. Asst. Leader
- Tv. S. Lalthamuan
3. Secretary - Tv. Lamnunfel
4. Asst. Secy. - Tv. Sutlianlal
5. Treasurer - Nk. Hawizokim
6. Finance - Nk. Nianglalle

PANGLIAN PASTOR BIAL KKP

Conference 15 veina
Ahun : 20th - 22nd Jan. 2023
Amun : Muallum Kochuam
Biak In

Thupi : "La khangdawng lai in
la siamtu hezing in." Tgt. 11:9

KUM 2023-24 PUITU DINGTE :

1. Leader - Tv. Gensiamlal
2. Asst. Leader - Tv. Zamkhotinlal
3. Secretary - Tv. Khuplemlal
4. Asst. Secy. - Tv. Kennedy
Paumuankhup
5. Treasurer - Nk. Nengneihing
6. Finance - Nk. Niangzoukim

PHAIPHENG PASTOR BIAL KKP

Conference 15 veina
Ahun : 20th-22nd Jan. 2023
Amun : Phaipheng kochuam
biak in

Thupi: "Thilpha bawl kizil un."
Isai 1:17

Thugentu : Upa. K muanlal

KUM 2023-2024 puitu dingte :

1. Leader - Tv. Khamthanglun
2. Asst. Leader - Manglalthuam
3. Secretary - Tv. Hauchansang
4. Asst. secy - Tv. Paukaplian
5. Treasurer - Tv. Lamsonlian
6. Finance - Pu. Soilalmuan

S. KAWTLIAN PASTOR BIAL

KKP Conference 15 veina
A hun : 20th - 22nd Jan. 2023
A mun : T. Munjang Kochuam
Biakin

Thupi : "Thawk Hatna"
~ Mat.24:13

KAWLHEN PASTOR BIAL KKP

Conference 16 veina
Ahun : 20th - 22nd Jan. 2023
Amun : DAWZANG KOCHUAM
BIAKIN

Thupi : "La nu leh la pa za in"
(Epesha 6:1)

Speaker : Rev. Khaisonthang,
Bialtu Pastor
KUM 2023-2024 Puitu dingte:
1. Leader: Tv Lalkam
2. Asst. Leader : T/Upa Siampu
3. Secretary : Tv Kam Joy
4. Asst. Secretary :
Tv. Pauthiangou
5. Treasurer: Tv. Thanglunmang
6. Finance : Nk. Joicy

LEILON PASTOR BIAL KKP
Conference 21 veina
Ahun : 20th-22nd Jan. 2023
Amun : T. Khawvaiphei
Kochuam
Thupi : “Ga zing ding leh ga um
zing ding” (John
15:16)

PUITU DING TE (2023-2024)
1. Leader : Tv. Papao
2. Asst. Leader :
Tv. Ajay Letminlen
3. Secretary : Pa Sarael
4. Asst. Secy. : Nk. Gracy
5. Treasurer : Nk. Chongboi
6. Finance : Tv. Robert

NEW LAMKA PASTOR BIAL KKP
Conference 9 veina
Ahun : 20th-22nd Jan. 2023
Amun : New Lamka Kochuam
Biakin

Thupi : “La thei tawp sua in”
(II Tim. 2:15)
KUM 2023-2024 Puitu dingte:
1. Leader - T/Upa. V. Thangboi
2. Asst. Leader - Kapsonlal
3. Secretary - Khambiaklal
4. Asst. Secy. - Paulalsawm
5. Treasurer - Thangneu
6. Finance - Khamminthang

PHAILIANBUNG PASTOR BIAL
KKP Conference 13 veina
Ahun - 20th-22nd Jan. 2023
Amun - Vokbual Presbyterian
Kochuam
Thupi: “La Pathian tuak dingin
kisazo ta’n” Amos 4:12
Puitu dingte (2023-24)
1. Leader - Tv. Haulalmuan
2. Asst Leader -
Tv. Thangsuanlal
3. Secretary- Tv. Lalkhokhai
4. Asst. Secy. - Tv. Songlalsat
5. Treasurer -
Nk. Tingnianghawi
6. Fin sec - Nk. NgaiParkim

Zia sia hi tuchung ah suklat
thei a hi phawt hi. Bial tin te’n
Conference lawting tak ah i
mat thei ziak un Pathian kiang
in kipakthu gen hitiu.

KNP HUANG

1. Tarik 14th January, 2023 ni in Sugnu Bial KNP in Sokom Kochuam Biakin ah Pauchapkhawmna ala nei u'i.



2. Tarik 14th January, 2023 ni in New Lamka Bial KNP te chun New Lamka Kochuam Biakin ah Pauchapkhawmna hun dak 10:30am - 1:00pm chan ala mang u'i.





Sunna

REV. T. NGAMA

(1st March, 1953 - 11th December, 2022)



Rev. T. Ngama (Tongzangam) hi Gelmual khua'n (Moirang kiang ah) March 1, 1953 kum in a piang ah, a pa hi Pu Ngulkholet a hi. A neu lai in a pate'n Ningthiching khua'n a pemplup'i'u ah, a vanglai ni cheng Ningthiching vangkhua'n a mang hi.

Ama hi Sunday School naupang a hi lai apat Pathian thu lunglut, naupang thumang thei tak a hi. Baptisma hi July 27, 1973 ah khan Famta Rev. Zamkai khut in Ningthiching MCO Biakin ah a chang ah, 1970 kum vel apat khan Ningthiching khua ah Khanglai Pawl – Young Christian Organisation (YCO) in mawpuakna chuam chuam a la tu pan ta a hi. Zilna lam ah chun 1980 kum in matric a lah zo ah, 1983 kum in PUC a zo kit hi. February 20, 1989 kumin L. Nengboi tawh a kicheng u'i.

1986 kum, July tha ah khan Tuikumuaallun Mission School in Headmaster na a sem pan ah, zia chu Mission na, full time ah a hung sep patna a hi tai. Gam lum a hi ziak in a hiselna tawh a kituak thei pua, kum 1987-1988 sung ah khan Phaipheng Mission School in Headmaster na sem in a kichawn hi. Zia zaw nung, kum 1989 kum in Mualkui in a sem ah, 1990 kum in T. Mino, Moreh khêl ah khin a sem kit hi. 1991 kum in a hung pawt ah, EOC Office ah sep thei sem in a um hi. Dinwiddie Bible College ah Theology a hung zil ah, a zaw nung, March

HINNA VÂK

16, 2002 ah khan Pastor Ordination a chang hi.

Pastor a sepna mun/Bial leh sep hun sung kumte :

Nasepna mun/Bial	Sep hun sung
Special Training at Aizawl Theological College, Durtlang	June 2002 – March 2003
Pastor, Vaiphei Veng, Lamka	April 2003 – Dec 2003
Pastor i/c Lamka Nuai	Jan 2004 – Dec 2007
Pastor i/c Kawlhen Pastor Bial	Jan 2008 – Dec 2009
Assistant Pastor, Durtlang, Aizawl	Jan 2010 – Dec 2010
Pastor i/c K. Sharonphai Pastor Bial	Jan 2011 – Dec 2012
Pastor i/c D. Khawzim Pastor Bial	Jan 2013 – Dec 2015

Ginum leh taima tak ah hun sawt tak ah sep nung in kum 2015 ah khan Tuikual Kochuam Biakin ah Mizoram Synod Kikhawmpi chun Pension ding in a hung thadawk ta, zia nung ah chun Molnom khua ah khawsa in, Kochuam nasepna leh programme te ngaikhawna ziak in Nazareth Presbyterian Kochuam, Lamka Pastor Bial in a lawi hi. 1. Rev, T. Ngama. 2. Lhingkhoneng. 3. Lalboi tehi date 24th May 2017 (Nilaizan) in bialtu pastor Rev. Zoliansanga, Bialtu Pastor in amau hung kidawtna kochuamte lemsak dungzui in lawplutna a nei hi.

Molnom ah kipat in a lawina Kochuam ahin mawpuakna chuam chuamte piak a hi sek ah, tu kum ahin le auditor ding ah guat a hi. December 11, 2022 ni'n Nazareth Kochuam Biakin ah Pathianni zingkal Biakna Kikhawp hun in Thawlawm lantu'n a pang ah, chuleh Sunday School genkhawm hun inle a genkhawmtu in a pang hi. Kikhawppel a, Kochuam sum audit a bawl zinglai in **Lungphut chawl (heart attack)** a hun nei thut a, Kochuamte'n Churachandpur District Hospital kintak ah delpi himaleh a mun tung manlo in a nâ a sepkiak, Pathian kiang ah chawldam ta dingin nitak lam 2:00 P.M. in a

February 2023

ngaicheng, a Insungmi, a khua mite leh a Kochuamte nusia in Kumtuang gam ala zuan ta'i. Ama hi mi taima leh gunchu tak ahia, lekha zik thiam tak le a la hi'i.

A chate :

1. Pi Hatlemmoi w/o Letminthang Kipgen
2. Pi Nemthenhoi w/o Thangkhochon Haokip
3. Tv. Lalboi

A vuiliamna programme hi 12/12/2022 ni'n a umna Molnom khua'n Rev. ST Khuppa'n a mang ah, Biakin leh Thân lam in Rev. Kamkhotinthang Neihsial in a mang hi.

Report petu
Upa Ngulzathang
Secretary
Nazareth Kochuam

SUKDIKNA

Hinna vak lâk man hi tukum 2023 ah kipat kumkhat ah ₹150/- hi ding a hi tai ti i kihatsak u'i. January 2023 issue ah a lâk man ₹100/- tia kizik pen kha sukkhial khak ahia, ngaina ah simtu zosiate kiang in la hiatthiamnau ka hung dawn hi.

~Editor